



KREANDO PROSPERIDAT DOR DI KONEKTÁ OPORTUNIDATNAN DI INVERSHON KU INVERSHONISTANAN

SKINA DI INVERSHONISTA

Publikashon 10. 2017

Entrenamentu pa invershonista prinsipiante

Parti 3

“Un di e kosnan masha bunita di hasi negoshi den e bolsa di balor ta ku bo ta siña di tur e diferente aspektonan di e ekonomia. E ta bo bentana riba un mundu masha grandi”

Ron Chernow

Esaki ta e di tres parti di kontinuashon di un seri di tres parti. Parti 1 i 2 a trata e promé dos tepnan (kon pa selektá un konsehero di invershon kalifiká i kon pa habri un kuenta di broker, inkluso e kriterionan di selekshon di un konsehero / broker) i ta disponibel na www.vertexinv.com òf na www.dcsx.cw.

Den e publikashon aki nos lo diskutí tres tep adishonal pa prinsipiante ku ke kuminsá hasi negoshi den akshon i bono. Nan ta:

1. Hasi kontribushonnan Regularmente

Hasi kontribushonnan mensual na bo kuenta di broker for di bo entradanan. Kòrda e 10% ku bo ta kita for di bo salario kada luna – sin ningun eksepsjon – komo parti di bo strategia

di “paga bo mes promé” ? *Chèk online e strategia di ‘paga bo mes promé’ ku bo a topa den e publikashon anterior di ‘Planifikashon, Invershon i Pasonan pa Kreashon di Rikesa Parti 2’ i tambe tur e otro publikashonnan anterior.* Un parti, of si no tur, di e dedukshonnan personal aki mester bai pa bo kuenta di broker. Pa hasi esaki, mi ta rekomendá pa establese un Pre-Authorized Charge (PAC). Esaki ta un suma pre-areglá ku ta wòrdu kitá tur luna outomátikamente for di bo salario i ta wòrdu mandá pa bo kuenta di broker. Lag’é bai outomátiko pa bo no por mete ku su progreso. Si bo por areglá esaki ku bo doño di trabou pa asina e wòrdu kitá for di bo salario promé ku e yega bo kuenta di salario – esei lo ta perfekto. Si esei no ta un opshon, por ta útil pa areglá pa lanta e sèn outomátikamente komo un standing order òf via bo online banking.

E bunitesa di un PAC ta ku e ta permití bo di tin benefisio di un téknika usá pa profeshonalnan di invershon yamá Dollar Cost Averaging (DCA). Ta zona kompliká, pero no tin nodi di preokupá. Laga mi splika un ke otro. DCA ta un strategia ku ta wòrdu usá huntu ku un PAC pa protehá kontra di kambionan frekvente di preis. Asta e mihó gurunán di invershon no por time e merkado pa sa ki ora ta mihó pa kumpra òf bende un akshon. P’ e motibu ei, por fabor no purba di time e merkado bo mes, set òp un PAC en bes di esei! Ku su suma fiho regular riba un término regular – por ehèmpel mensual – e PAC, usando DCA, ta probechá di fluktuashonnan di e bolsa di balor. E ta pone bo kumpra ménos unidat di un akshon ora e preis ta muchu altu i mas unidat di e akshonnan ora e preis kai. Komo resultado, e preis promedio di un akshon ku bo kumpra lo ta mas abou, i mihó ainda bo no tin nodi di preokupá si bo ta kumprando e akshon na un momento korekto òf nò. Tur esaki naturalmente bou di e suposishon ku bo ta un invershonista di término mas largu.

2. Revisá bo kuenta por lo ménos anualmente

Topa ku bo konsehero di invershon riba un base anual i revisá tur e kambionan personal i kon nan lo por afektá bo metanan. Por ta bo sirkunstansianan a kambia; por ta bo a haña un yu mas òf a kambia di trabou òf asta a pèrdè bo trabou. E kambionan aki ta nifiká ku bo meta di invershon por kambia. Por ehèmpel, haña un yu mas por nifiká ku awor bo mester prepará pa gastunan di universidat banda di penshun. Esakinan por tin diferente lapso di tempu i komo tal por eksigí diferente strategianan di invershon. Tur informashon nobo mester wòrdu inkorporá pa sigurá ku bo strategia di invershon ta keda relevante tur tempu di akuerdo ku bo sirkunstansianan i metanan! Mihó ainda, pa kada informashon nobo (kambio

den bo situashon finansiero general), di kon warda te fin di e aña, notifiká bo konsehero mes ora!

3. Eduká bo mes riba un base kontinu

Trata di no alehá bo for di diskushon òf notisia tokante invershonnan. Al kontrario, lesa mas, wak mas! Kana rònt ku un klatblòk chikitu òf usa e aplikashon di nota riba bo selular, i si algu surgi den notisia tokante invershonnan ku bo no ta sigur di dje, hasi uso di e oportunidat pa diskutí esei ku bo konsehero di invershon. Dor di hasi esaki, bo lo ripará kuantu bo konosementu di asuntunan finansiero lo amplia.

Pues ata nan, nos 5 tepnan presentá den e seri di tres parti aki -1) buska un konsehero di invershon kalifiká, 2) habri un Kuenta di Broker (Parti 1 & 2); 3) Krea un PAC i kontribuí mensualmente; 4) Revisá bo kuenta di broker por lo ménos anualmente; i 5) proaktívemente amplia bo konosementu di informashon finansiero (Parti 3).

Sigui Skina di Invershonista pa tur kos ku bo mester sa tokante Kreashon di Rikesa!

E editorial aki ta wòrdu presentá na bo pa e DCSX ku kolaborashon di Vertex Investments . Outor di e publikashon aki: Stephanie Shaw CFA, MBA.



vertexinv.com